

卷二十八

廣文選卷第一



天地廣

天地賦

成公子安

明通議大夫都察院右副都御史大庾劉節廣



書名 廣文選八十二卷 嘉靖十二年序刊本
撰者 明 劉節 輯
卷 卷二十八
內容分類 集-總集-詩文
索書號 大木-集部-總集類-3

編號 D7920300

彩色首頁1

東洋文化研究所漢籍目錄 編號: D7920300

東洋文化研究所漢籍目錄所藏漢籍善本文影像資料庫 索書號: 大木-集部-總集類-3

漢籍善本文影像資料庫文本 廣文選八十二卷 嘉靖十二年序刊本

版權所有: 東京大學 東洋文化研究所

使用上的注意事項

惟自然之初載兮道虛無而玄清太素紛以溷淆兮始
有物下而混成何元一之芒昧兮廓開闢而著形爾乃清
濁剖玄黃判離太極既殊是生兩儀星辰煥列日月
重規以尊地靜以卑昏明迭炤或盈或虧陰陽協
氣而寒暑隨時而推移三才殊性五行異位千變
萬化度類授之以形稟之以氣色表文采聲有音
律復言方流形品物鼓以雷霆潤以慶雲八風翱翔

之軀而別離兮放遊志乎雲中乘精氣之搏搏兮驚諸
神之湛湛驂白霓之習習兮歷羣靈之豐豐左朱雀之
芟芟兮右蒼龍之躍躍屬雷師之闐闐兮通飛廉之衙
衙前輕輦之鏘鏘兮後輜乘之從從載雲旗之委蛇兮
扈屯騎之容容計專專之不可化兮願遂推而爲臧賴
皇天之厚德兮還及君之無恙

廣文選卷第二十七

江都葛澗校

廣文選卷第二十八

明通議大夫都察院右副都御史大庾劉節廣

騷中

大招

景差

青春受謝白日昭只春氣奮發萬物遽只冥凌泱行魂
無逃只魂魄歸徠無遠遙只魂乎歸徠無東無西無南
無北只東有大海溺水泚泚只螭龍並流上下悠悠只
霧雨淫淫白皓膠只魂乎無東湯谷宗只魂乎無南南
有炎火千里腹蛇虺只山林險隘虎豹蜿只鱖鱗短狐
王虺騫只魂乎無南蜮傷躬只魂乎無西西方流沙溱
洋洋只豕首縱目被髮鬢只長爪踞牙諛笑狂只魂乎
無西多害傷只魂乎無北北有寒山連龍絕只伐水不



可涉深不可測只天白顛顛寒凝凝只魂乎無往盈北
 極只魂魄歸徠間以靜只自恣荆楚安以定只逞志究
 欲心意安只窮身安樂年壽延只魂乎歸徠樂不可言
 只五穀六仞設菰梁只鼎臠盈望和致芳只內鷓鴣
 味豺羹只魂乎歸徠恣所嘗只鮮鵝甘鷄和楚酪只醢
 豚苦狗膾菹葷只吳酸蒿萋不沾薄只魂兮歸徠恣所
 擇只炙鵠丞鳧粘鷄噉只煎鱖雁雀遠爽存只魂乎歸
 徠麗以先只四酎并孰不盈盍只清馨凍飲不歡役只
 吳醴白蘘和楚瀝只魂乎歸徠不遽惕只代秦鄭衛鳴
 竽張只伏戲駕辯楚勞商只謳和揚阿趙簫倡只魂乎
 歸徠定空桑只二八接舞投詩賦只叩鍾調磬娛人亂
 只四上競氣極聲變只魂乎歸徠聽歌謔只朱脣皓齒
 婢以媵只比德好間習以都只豐肉微骨調以娛只魂
 乎歸徠安以舒只媵目宜笑蛾眉曼只容則秀雅穉朱
 顏只魂乎歸徠靜以安只媵脩滂浩麗以佳只曾頰倚
 耳曲眉規只滂心綽態姣麗施只小腰秀頸若鮮卑只
 魂乎歸徠思怨移只易中利心以動作只粉白黛黑施
 芳澤只長袂拂面善留客只魂乎歸徠以娛音只青色
 直眉美目姁只靨輔奇牙宜笑嗎只豐肉微骨體便娟
 只魂乎歸徠恣所便只夏屋廣大沙堂秀只南房小壇
 觀絕雷只曲屋步擗宜擾畜只騰駕步遊獵春囿只瓊
 轂錯衡英華假只蒞蘭桂樹鬱彌路只魂乎歸徠恣志
 慮只孔雀盈園畜鸞皇只鷓鴣群晨雜鴝鴒只鴻鵠代
 遊曼鷓鴣只魂乎歸徠鳳皇翔只曼澤怡面血氣盛只

未宜厥身保壽命只室家盈廷爵祿盛只魂乎歸徠居
室定只接徑千里出若雲只三主重侯聽類神只察篤
天隱孤寡存只魂兮歸徠正始昆只田邑千畛人阜昌
只美冒衆流德澤章只先威後文善美明只魂乎歸徠
賞罰當只名聲若日照四海只德譽配天萬民理只北
至幽陵南交趾只西薄羊腸東窮海只魂乎歸徠尚賢
士只發政獻行禁苛暴只舉傑壓陞誅譏罷只直羸在
位近禹麾只豪傑執政流澤施只魂乎徠歸國家爲只
雄雄赫赫天德明只三公穆穆登降堂只諸侯畢極立
九卿只昭質旣設大侯張只執弓挾矢揖辭讓只魂乎
徠歸尚三王只

惜誓

賈誼

惜余年老而日衰兮歲忽忽而不反登蒼天而高舉兮
歷衆山而日遠觀江河之紆曲兮離四海之霑濡攀北
極而一息兮吸沆瀣以克虛飛朱鳥使先驅兮駕太一
之象輿蒼龍蚘虬於左驂兮白虎騁而爲右駢建日月
以爲蓋兮載玉女於後車馳騫於杳冥之中兮休息虛
崑崙之墟樂窮極而不馱兮願從容虛神明涉丹水而
馳騁兮右大夏之遺風黃鵠之一舉兮知山川之紆曲
再舉兮睹天地之圜方臨中國之衆人兮託回飈乎尚
羊乃至少原之壑兮赤松王喬皆在旁二子擁瑟而調
均兮余因稱乎清商澹然而自樂兮吸衆氣而翱翔念
我長生而久僊兮不如反余之故鄉黃鵠後時而寄處
兮鷓鴣羣而制之神龍失水而陸居兮爲螻蟻之所裁

夫黃鵠神龍猶如此兮况賢者之逢亂世哉壽冉冉而日衰兮固儻回而不息俗流從而不止兮衆枉聚而矯直或偷合而苟進兮或隱居而深藏苦稱量之不審兮同權槩而就衡或推逡而苟容兮或直言之諤諤傷誠是之不察兮并紉茅絲以爲索方世俗之幽昏兮眩白黑之美惡放山淵之龜玉兮相與貴夫礫石梅伯數諫而至醢兮來革順志而用國悲仁人之盡節兮反爲小人之所賊比干忠諫而剖心兮箕子被髮而佯狂水背流而源竭兮木去根而不長非重軀以慮難兮惜傷身之無功已矣哉獨不見夫鸞鳳之高翔兮乃集太皇之櫺循四極而回周兮見盛德而後下彼聖人之神德兮遠濁世而自藏使麒麟可得羈而係兮又何以異虛犬

七諫

東方曼倩

平生於國兮長於原壑言語訥謔兮又無彊輔淺智褊能兮聞見又寡數言便事兮見怨門下王不察其長利兮卒見棄平原櫛伏念思過兮無可改者群衆成朋兮上浸以惑巧佞在前兮賢者滅息堯舜聖已沒兮孰爲志直高山崔巍兮水流湯湯死日將至今兮與麋鹿同坑塊鞅兮當道宿舉世皆然兮余將誰告斥逐鴻鵠兮近習鴟梟斬伐橘柚兮列樹苦桃便娟之脩竹兮寄生乎江潭上歲蕤而防露兮下泠泠而來風孰知其不合兮若竹栢之異心往者不可及兮來者不可待悠悠蒼天兮莫我振理竊怨君之不寤兮吾獨死而後已

初放

惟往古之得失兮覽私微之所傷堯舜聖而慈仁兮後
世稱而弗忘齊桓失於專任兮夷吾忠而名彰晉獻惑
於嬖姬兮申生孝而被殃偃王行其仁義兮荆文寤而
徐亡紂暴虐以失位兮周得佐乎呂望修往古以行恩
兮封比干之丘隴賢俊慕而自附兮日浸淫而合同明
法令而修理兮蘭芷幽而有芳苦衆人之妬予兮箕子
寤而佯狂不顧地以貪名兮心怫鬱而內傷聯蕙芷以
爲佩兮過鮑肆而失香正臣端其操行兮反離謗而見
攘世俗更而變化兮伯夷餓於首陽獨廉潔而不容兮
叔齊久而逾明浮雲陳而蔽晦兮使日月乎無光忠臣
貞而欲諫兮讒諛毀而在旁秋草榮其將實兮微霜下
而夜降商風肅而害生兮百草育而不長衆並諧以妬
賢兮孤聖特而易傷懷計謀而不見用兮巖穴處而隱
藏成功隳而不卒兮子胥死而不葬世從俗而變化兮
隨風靡而成行信直退而毀敗兮虛僞進而得當追悔
過之無及兮豈盡忠而有功廢制度而不用兮務行私
而去公終不變而死節兮惜年齒之未央將方舟而下
流兮冀幸君之發矇痛忠言之逆耳兮恨申子之沈江
願悉心之所聞兮遭值君之不聰不開寤而難道兮不
別橫之與縱聽奸臣之浮說兮絕國家之久長滅規渠
而不用兮背繩墨之正方離憂患而乃寤兮若縱火於
秋蓬業失之而不救兮尚何論乎禍凶彼離畔而朋黨
兮獨行之士其何望日漸染而不自知兮秋毫微哉而

變容衆輕積而折軸兮原咎雜而累重赴湘沅之流漸
兮恐逐波而復東懷沙礫而自沉兮不忍見君之蔽壅

沈江

世沉淖而難論兮俗吟峨而慘嗟清泠泠而殲滅兮溷
湛湛而日多梟鴟既以成羣兮玄鶴弭翼而屏移蓬艾
親入御於庠第兮馬蘭踈蹕而日加棄捐葑芷與杜衡
兮余柰世之不知芳何何周道之平易兮然蕪穢而險
戲高陽無故而委塵兮唐虞點灼而毀議誰使正其真
是兮雖有八師而不可爲皇天保其高兮后土持其久
服青白以逍遙兮偏與乎玄英異色西施媿媿而不得
見兮萋毋勃屑而日侍桂蠹不知所淹留焉蓼蟲不知
走乎葵菜處濇濇之濁世兮今安所達乎五志意有所
載而遠逝兮固非衆人之所識驢躑躅於弊葦兮遇孫
陽而得代口望窮困而不聊生兮遭周文而舒志甯戚
飯牛而商歌兮桓公聞而弗置路室女之方桑兮孔子
過之以自侍吾獨垂刺而無當兮心悼怵而耄思思比
干之泯泯兮哀子胥之慎事悲楚人之和氏兮獻寶玉
以爲石遇厲武之不察兮羗兩足以畢斯小人之居勢
兮視中正之何若改前聖之法度兮喜羅罽而妄作親
讒諛而疏賢聖兮訟謂閭媿爲醜惡愉近習而蔽遠兮
孰知察其黑白卒不得效其心容兮安眇眇而無所歸
薄專精爽以自明兮晦冥冥而壅蔽年旣已過大半兮
然輻輳而留滯欲高飛而遠集兮恐離罔而滅敗獨寃
抑而無極兮傷精神而壽天皇天旣不純命兮余生終

無所依願自沈於江流兮絕橫流而徑逝寧爲江海之
泥塗兮安能久見此濁世

怨世

賢士窮而隱處兮廉方正而不容子胥諫而靡軀兮比
干忠而剖心子推自剖而飲君兮德日忘而怨深行明
白而曰黑兮荆棘聚而成林江離棄於窮巷兮蒺藜蔓
平東廂賢者蔽而不見兮讒諛進而相朋梟鴟並進而
俱鳴兮鳳皇飛而高翔願壹往而徑逝兮道壅絕而不
通

怨思

居愁慙其誰生兮獨未思而憂悲內自省而不慙兮操
愈堅而不衰隱三年而無決兮歲忽忽其若頽憐余身
不足以卒意兮冀一見而復歸哀人事之不幸兮屬天
命而委之咸池身被疾而不聞兮心沸熱其若湯冰炭
不可以相並兮吾固知乎命之不長哀獨苦死之無樂
兮惜余年之未央悲不反余之所居兮恨離予之故鄉鳥
獸驚而失羣兮猶高飛而哀鳴狐死必首丘兮夫人孰
能不反其真情故人疏而日忘兮新人近而俞好莫能
行於杳冥兮孰能施於無報若衆人之皆然兮乘回風
而遠遊凌恒山其若陋兮聊愉娛以忘憂悲虛言之無
實兮若衆口之鑠金過故鄉而一顧兮泣歔歔而霑衿
厭白玉以爲面兮懷琬琰以爲心邪氣入而感內兮施
玉色而外淫何青雲之流瀾兮微霜降之蒙蒙余風至
而徘徊兮疾風過之湯湯聞南藩樂而欲往兮至會稽

而且止見韓衆而宿之兮問天道之所在借浮雲以送
 予兮載雌霓而為旌駕青龍以馳騫兮班衍衍之冥冥
 忽容容其安之兮超慌忽其焉如苦衆人之難信兮願
 離羣而遠舉登巒山而遠望兮好桂樹之冬榮觀天火
 之炎燭兮聽大壑之波聲引八維以自道兮含沆瀣以
 長生居不樂以時思兮食草木之秋實飲菌若之朝露
 兮構桂木而為室雜橘柚以為園兮列新夷與椒楨鷓
 鶴孤而夜號兮哀居者之誠貞

自悲

哀時命之不合兮傷楚國之多憂內懷情之潔白兮遭
 亂世而離尤惡耿介之古且行兮世溷濁而不知何君臣
 之相失兮上元相而分離則日羅之湘水兮知時固而
 不反傷離散之交亂兮遂側身而既遠處玄舍之幽門
 兮穴巖石而窟伏從水蛟而為徒兮與神龍乎休息何
 山石之嶄巖兮靈魂屈而偃蹇含素水而蒙深兮日眇
 眇而既遠哀形體之離解兮神罔兩而無舍惟椒蘭之
 不反兮魂迷惑而不知路願無過之設行兮雖滅沒之
 自樂痛楚國之流亡兮哀靈脩之過到固時俗之溷濁
 兮志瞶迷而不知路念私門之正匠兮遙涉江而遠去
 念女嬃之嬋媛兮涕泣流乎於悒我決死而不生兮雖
 重追吾何及戲疾瀨之素水兮望高山之蹇蹇哀高丘
 之赤岸兮遂沒身而不反

哀命

怨靈修之浩蕩兮夫何執操之不固悲泰山之為隍兮

孰江河之可涸願承間而效志兮恐犯忌而干諱卒撫
情以寂寞兮然怛悵而自悲玉與石而同置兮貫魚眼
與珠璣駑駘雜而不分兮服罷牛而驟驥年滔滔而日
遠兮壽冉冉而俞衰心怵憚而煩冤兮蹇超擢而無冀
固時俗之工巧兮滅規槩而改錯却騏驥而不乘兮策
駑駘而取路當世豈無騏驥兮誠無王良之善馭見執
轡者非其人兮故駒跳而遠去不量鑿而正柄兮恐槩
獲之不同不論世而高舉兮恐操行之不調弧弓弛而
不張兮孰云知其所至無傾危之患難兮焉知賢士之
所死俗推佞而進富兮飾行張而不著賢良蔽而不群
兮朋曹比而黨譽邪枉說飾而多曲兮正法張而不公
直士隱而辭匿兮讒諛登乎明堂棄彭咸之娛樂兮巧
倖之繩墨昔昆路雜於叢蒸兮機蓬矢以射革駕蹇驢而
無策兮又何路之能極以直鍼而爲釣兮又何魚之能
得伯牙之絕弦兮無鍾子期而聽之和抱璞而泣血兮
安得良工而剖之同音者相和兮同類者相似飛鳥號
其羣兮鹿鳴求其友故叩宮而宮應兮彈角而角動虎
嘯而谷風至兮龍舉而景雲徃音聲之相和兮言物類
之相感也夫方圓之異形兮勢不可以相錯列子隱身
而窮處兮世莫可以寄託衆鳥皆有行列兮鳳有翱翔
而無所簿經濁世而不得志兮願側身巖穴而自託欲
闔口而無言兮嘗被君之厚德獨便愔而懷毒兮愁鬱
鬱之焉極念三年之積思兮願壹見而陳詞不及君而
騁說兮世孰可爲明之身寢疾而百愁兮情沉抑而不

揚衆人莫可與論道兮悲精神不通

謬諫

亂曰鸞皇孔鳳日以遠兮畜見駕鵝鷄鶩滿堂壇兮鼃
眦游乎華池要裏奔亡兮騰駕橐駝鈔刀進御兮遙棄
太阿拔舉玄芝兮列樹芋荷橘柚萎枯兮苦李旖旎甌
甌登於明堂兮周鼎潛乎深淵自古而固然兮吾又何
怨乎今之人

哀時命

莊忌

哀時命之不及古人兮夫何予生之不遘時往者不可
扳援兮俛者不可與期志憾恨而不逞兮杼中情而屬
詩夜炯炯而不寐兮懷隱憂而歷茲心鬱鬱而無告兮
衆孰可與深謀欲愁悴而委惰兮老冉冉而逮之居處

而無梁願至崑崙之懸圃兮采鍾山之玉英擘瑶木之
禰枝兮望閭風之板桐弱水汨其爲難兮路中斷而不
通勢不能凌波以徑度兮又無羽翼而高翔然隱閔而
不達兮獨徙倚而彷徨悵罔呂永思兮心紆軫而增
傷倚躊躇以淹留兮日飢饉而絕糧廓抱景而獨倚兮
超未思乎故鄉廓落寂而無友兮誰可與玩此遺芳白
日晚晚其將入兮哀余壽之弗將車旣弊而馬罷兮蹇
遭徊而不能行身旣不容於濁世兮不知進退之宜當
冠崔嵬而切雲兮劔淋離而從橫衣攝葉以儲與兮左
祛挂於樽桑左衽拂於不周兮六合不足以肆行上同
鑿枘於伏戲兮下合矩矱於虞唐願尊節而式高兮志

猶卑夫禹湯雖知困其不改操兮終不以邪枉害方世
並舉而好朋兮壹斗斛而相量衆比周以肩迫兮賢者
遠而隱藏爲鳳皇作鷄籠兮雖翕翅其不容靈皇其不
寤知兮焉陳詞而効忠俗嫉妬而蔽賢兮孰知余之從
容願舒志而抽馮兮庸詎知其吉凶璋珪雜於甌窶兮
隴廉與孟姬同官舉世以爲恒俗兮固將愁苦而終窮
幽獨轉而不寐兮惟煩懣而盈匈竟眇眇而馳騁兮心
煩寃之憺憺志欲憾而不得兮路幽昧而甚難塊獨守
此曲隅兮然欲切而永歎愁修夜而宛轉兮氣澶灩其
若波握剗刷而不用兮操規集而無所施騁騏驎於中
庭兮焉能極夫遠道置援狃干櫺檻兮夫何以責其捷
獲兮何權衡之能稱崑崙雜於廢蒸兮機逢矢以射革
負檐荷以丈尺兮欲伸要而不可得外迫脅於機臂兮
上牽聯於矰雉肩傾側而不容兮固陜腹而不得息務
光自投於深淵兮不獲世之塵垢孰魁摧之可久兮願
退身而窮處鑿山楹而爲室兮下被衣於水渚霧露濛
濛其晨降兮雲依斐而承宇虹霓紛其朝霞兮夕淫淫
而淋雨怊茫茫而無歸兮悵遠望此曠野下垂釣於谿
谷兮上要求於僊者與赤松而結友兮比王僑而爲耦
使臯楊先導兮白虎爲之前後浮雲霧而入冥兮騎白
鹿而容與竟眇眇以寄獨兮汨徂往而不歸處卓卓而
日遠兮志浩蕩而傷懷鸞鳳翔於蒼雲兮故矰繳而不
能加蛟龍潛於旋淵兮身不挂於罔羅知貪餌而近死

焉不如下游乎清波寧幽隱以遠禍兮孰侵辱之可爲
予胥死而成義兮屈原沈於汨羅雖體解其不變兮豈
忠信之可化志怍怍而內直兮履繩墨而不頗執權衡
而無私兮稱輕重而不差概塵垢之枉攘兮除穢累而
反真形體白而質素兮中皎潔而淑清時馱飶而不用
兮且隱伏而遠身聊竄端而匿迹兮嘆寂默而無聲獨
便泊而煩毒兮焉發憤而抒情時曖曖其將罷兮遂悶
歎而無名伯夷死於首陽兮卒天隱而不榮太公不遇
文王兮身至死而不得逞懷瑤象而佩瓊兮願陳列而
無正生天畧之若過兮忽爛漫而無成邪氣襲余之形
體兮疾憊怛而萌生願壹見陽春之白日兮恐不終乎
永年

九懷

王子淵

極運兮不中來將屈兮困窮余深愍兮慘怛願一列兮
無從乘日月兮上征顧遊心兮高艷彌覽兮九隅彷徨
兮蘭宮芷閭兮葯房奮搖兮衆芳茵閣兮蕙樓觀道兮
從橫寶金兮委積美玉兮盈堂桂水兮潺湲揚流兮洋
洋著蔡兮踊躍孔鶴兮回翔撫檻兮遠望念君兮不忘
佛鬱兮莫陳求懷兮內傷

匡機

天門兮鑿戶孰由兮賢者無正兮溷廁懷德兮何覩假
寐兮愍斯誰可與兮寤語痛鳳兮遠逝畜鳩兮近處鯨
鱓兮幽潛從蝦兮遊階乘虬兮登陽載象兮上行朝發
兮葱嶺夕至兮明光北飲兮飛泉南采兮芝英宣遊兮

列宿順極兮彷徨紅采兮駢衣翠縹兮爲裳舒佩兮綈
纒竦余劔兮干將騰蛇兮後從飛馭兮步旁微觀兮玄
圃覽察兮瑤光啓匱兮探筴悲命兮相當紉蕙兮永記
將離兮所思浮雲兮容與道余兮何之遠望兮仟眠聞
雷兮闐闐陰憂兮感余惆悵兮自怜

通路

林不容兮鳴蜩余何留兮中州陶嘉月兮總駕攀玉英
兮自修結榮蔭兮逶逝將去烝兮遠遊徑岱土兮魏闕
歷九曲兮牽牛聊假日兮相佯遺光耀兮周流望太一
兮淹息紆余轡兮自休晞白日兮皎皎彌遠路兮悠悠
顧列宇兮縹縹觀幽雲兮陳浮鉅寶遷兮砢礪雉咸雥
兮相求泱莽莽兮究志惧吾心兮憐憐步余馬兮飛柱
覽可與兮匹儔卒莫有兮繼介永余思兮怊怊

危俊

世溷兮冥昏違君兮歸具乘龍兮偃蹇高回翔兮上臻
襲英衣兮緹縹披華裳兮芳芬登羊角兮扶輿浮雲漠
兮自娛握精神兮雍容與神人兮相胥流星墜兮成雨
進隣盼兮上丘墟覽舊邦兮滄鬱余安能兮久居志懷
逝兮心慳慄紆余轡兮躊躇聞素女兮微歌聽王后兮
吹竽魂悽愴兮感哀腸回回兮盤紆撫余佩兮續紛高
太息兮自憐使祝融兮先行令昭明兮開門馳六蛟兮
上征竦余駕兮入冥歷九州兮索合誰可與兮終生忽
反顧兮西囿覩軫丘兮崎傾橫垂涕兮泣流悲余后兮
失靈

昭世

季春兮陽陽列草兮成行余悲兮蘭生委積兮從橫江
離兮遺捐辛夷兮擠臧伊思兮往古亦多兮遭殃伍胥
兮浮江屈子兮沈湘運余兮念茲心內兮懷傷望淮兮
沛沛濱流兮則逝榜舫兮下流東注兮噉噉蛟龍兮導
引文魚兮上瀨抽蒲兮陳坐援芙蓉兮爲蓋水躍兮余
旌繼以兮微蔡雲旗兮電騫儻忽兮容裔河伯兮開門
迎余兮歡欣顧念兮舊都懷恨兮艱難竊哀兮浮萍汎
淫兮無根

尊嘉

秋風兮蕭蕭舒芳兮振條微霜兮眇眇病歿兮鳴蜩玄
鳥兮辭歸飛翔兮靈丘望谿兮滄鬱熊羆兮咆皞唐虞
兮不存何故兮久留臨淵兮汪洋顧林兮忽荒修余兮
袿衣騎霓兮南上乘雲兮回回疊疊兮自強將息兮蘭
臯失志兮悠悠紛蘊兮徵騫思君兮無聊身去兮意存
愴恨兮懷愁

蓄英

登九靈兮遊神靜女歌兮微晨悲皇丘兮積葛衆體錯
兮交紛貞枝抑兮枯槁枉車登兮慶雲感余志兮慘慄
心愴愴兮自憐駕玄螭兮北征鄉吾路兮葱嶺連五宿
兮建旄揚氛氣兮爲旌歷廣漠兮馳驚覽中國兮冥冥
玄武步兮水母與吾期兮南榮登華蓋兮乘陽聊逍遙
兮播光抽庫婁兮酌醴援庖瓜兮接糧畢休息兮遠逝
發玉軻兮西行惟時俗兮疾正弗可久兮此方寤辟標

兮永思心怫鬱兮內傷

思忠

覽杳杳兮世惟余惆悵兮何歸傷時俗兮溷亂將奮翼
兮高飛駕六龍兮連蜷建虹旌兮威夷觀中宇兮浩浩
紛翼翼兮上躋浮瀾水兮舒光淹低徊兮京社屯余軍
兮索反覩皇公兮問師道莫遺兮歸真羨余術兮可夷
吾乃逝兮南娛道幽路兮九疑越炎火兮萬里過萬首
兮嶷嶷濟江海兮蟬蛻絕北梁兮永辭浮雲鬱兮晝昏
霾土忽兮歷歷息陽城兮廣夏衰色罔兮中怠意曉陽
兮燎寤乃息軫兮存茲思堯舜兮襲興幸咎繇兮獲謀
悲九州兮靡若撫軾歎兮作詩

陶雍

悲哉于嗟兮心內切嗟歎冬而生兮凋彼葉柯瓦礫進
寶兮捐棄隨和鈇刀厲御兮頓棄太阿驥垂兩耳兮中
坂蹉跎蹇驢服駕兮無用日多修潔處幽兮貴寵沙廓
鳳皇不翔兮鶉鴉飛揚乘虹驂蜺兮載雲變化鶴鳴開
路兮後屬青蛇步驟桂林兮超驤卷阿丘陵翔舞兮谿
谷悲歌神章靈篇兮赴曲相和余私娛茲兮孰哉復加
還顧世俗兮壞敗罔羅卷佩將逝兮涕流滂沱

株昭

亂曰皇門開兮照下土株穢除兮蘭芷覩四佞放兮後
得禹聖舜攝兮昭堯緒孰能若兮願爲輔